

112 年全國語文競賽客家語朗讀文章國中學生組（饒平腔）

編號 1 號

【線上學習】李秉璋原作

神奇、神奇、真神奇，上課毋使趕，交通毋會塞，想愛學麼个，就學麼个。先生任僱擇、時間由僱選，三更半夜乜做得，先生講到心色又分明。佢做得係學生个先生，乜做得做先生个先生，總講佢門生滿天下，毋過，毋使準備拜師禮、乜毋使納學費，你想愛學，佢就會教。

毋管你係巧神¹抑係劣拙²，佢全收。佢無擇學生仔、無擇時間、無擇所在，單單擇你，擇你想愛學个心。這係學習个革命，這係時代个轉變。來到急、來到緊，跔得著斯大進步，就像臉身脣有仙人指點樣，武功大進。

馬桶毋曉得修理有人教，鏈鋸毋曉得發，一步一步來，祕訣³教你知。網路線个接頭線路毋曉得排，有人教你色目愛分明，五花十色照順序，工具還較特別，頭尾一下膠佢夾落去，接頭插下去網路就通。

雖然講單隻銀角毋會響，毋過先生大部分係自家在該唱戲，

講到口涎波潑、精神飽滿、歡頭喜面，全毋會慊又有耐心！一遍教毋會，再過教一遍，你想愛學幾多回就學幾多回，學到你會為止。

千里緣分一線牽，天下在僱彈指間。現代生活當舒適，冷氣吹，彈指間，毋使出門、毋使尖車，想愛仰般學就仰般學。就算係疫情个時節，學校个線上教學，有屑無恁自由，毋過乜有人相當認真，一頭聽課、一頭查資料，正經係一踢三通，師傅渡入門，修行在個人。上課講義自家留，毋需抄，三隻快速鍵一撇，滑鼠一點，講義隨留下來。

當日上課記錄先生有錄製。驚你單單係「用手機上課定」，人毋知走哪位去。所以先生上課會問問題，一半係問，一半係在該點名，睭你心思有在無？認真上課个，回答無問題還會講頭就知尾，無用心个乜無問題，平平無問題，這個係麼个就毋知，所以無問題。連先生喊佢回答，佢就像在人間消失，無鏡頭、乜無回答聲，訊息欄上乜無留字，所以佢正經係「用手機上課定」。

線上學習，成就隨在人，逐儕有擇个自由，就係愛對自家个人生負責。對自家未來正經个慷慨，就係現時愛煞猛打拚。今日个僱，成就韶早个僱。

¹ 巧神：音 kiau` shin / kiau` sin` / kiau` siin`；聰慧，屬具特殊能力的聰明。

² 劣拙：音 lod` zhod` / lod` zod`；形容人笨拙魯鈍。

³ 祕訣：音 bi` gied` / bi` gied`；訣竅，指事物的要領、竅門。

【火燒岫崗】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時，會睜著該一臺一臺個消防車駛出車庫停在路脣了，雖然睜毋著無閒泊杈個身影，乜聽毋著緊張刺耳個警報聲，毋過，空氣裡背因等一層愛定動個電波，一種神經擱纏個氣氛。

舊曆二月係美濃人掛紙個時節，恁多年天時改常¹，春雨慢到，二月個山崗燥絲絲仔，所以，第一隻拜六掛紙個臨暗開始，就會睜著山崗頂出現冲天個煙，接下來紅紅個火光就透出來了——阿母哀，火燒山崗了！消防車個身影像走相逐樣一路春往出，警報聲在街路項咻等過，一臺、兩臺、三臺……總下出動了，毋過，斷烏過後就難耐了，高不將換手腳流掠²個阿兵哥，提等鑷仔、刀嫲膠附近個竹頭、樹仔、草伐忒——斷火路。

第二日打早，「轟……叮叮叮叮、叮叮叮叮」直升機個聲音就在天頂來來去去響無停了。「直升機去美濃湖舀水了啲！」美濃湖黏時鬧熱起來，大家遽遽號³隻好位仔，坐下來定定仔睜等直

升機在湖面舀水个景象。遠遠飛過來个直升機，會到美濃湖个時節，就會慢慢仔降下來，等到屎肚下背个大袋仔揸著⁴水面，佢就會遽遽膠袋仔向前拖一下再過擲起來，淦淦一大袋个水就懸起來了，續等膠這恁大袋个水晃晃激激⁵懸到廣善堂背个山崗頂，對半天高漕啊下，恁大袋个水隨化做一陣白白个濛煙散淨淨。

天頂个直升機一輪又一輪、對打早飛到斷烏；山腳下消防車个水一管又一管緊擲；山崗頂紅紅个影跡對山前遭到山背、對山坪遭到山頂。更深夜靜个暗晡，總會聽著竹頭燒到劈哩叭啦⁶響个聲音，火屎就跔等風滿哪飛，天光時節，家家屋屋个屋頂、大路町、田坵肚跌下全全係烏烏个火屎。山崗个火日夜燒等，山下个消防車、救護車、阿兵哥乜日夜掌等……下把仔伸著衝天个白煙，大家想愛歇睏一下个時節，紅紅个火蛇嘎又好點點仔躡啊出⁷，就恁樣一直愛燒到掛紙結束。

火燒山對環境、對山林个破壞十分大，睜著斬竹頭个阿兵哥分樹極仔劃到手膠面都血流血著，實在分人毋盼得，掛紙个方式係毋係需要鄉親好好來思考、參詳呢？

¹ 改常：音 goi` shong / goi` song`；反常。

² 流掠：音 liu liag；動作敏捷。

³ 號：音 ho` / ho；霸佔。

⁴ 揸著：音 dud` do` / dud` do`；碰觸到。

⁵ 晃晃激激：音 gong gong geb geb / gong` gong` geb geb；因搖晃使得水從容器中溢出來。

⁶ 劈哩叭啦：音 pi li pa la；竹子燒裂的聲音。

⁷ 躡啊出：音 liung` a` chud` / liung` a` cud`；鑽出來。

112 年全國語文競賽客家語朗讀文章國中學生組（饒平腔）

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背尾升起來，輝煌又晟眼个金線射入天頂。佢箭等該臺一騎斯響歸路个老自行車，來到佢个百果園，還話講今晡日日頭一出來斯到位，算當早了！無胚著，正踏入園肚，隔壁種水梨个阿權哥斯在該大聲嘍了！「喂！日頭恁高了正到位哦，仰做有事？」

唉！佢都恁早了，還輸佢，這阿權哥係歸暗晡毋使睡係無？仰會七早八早斯來到位？心肝還想等，嘴項又毋肯認輸，對嘴斯應佢：「無啦！毋係來做事，係來睺鷓鴣个啦！」

佢个園在山龍圍等个窩肚，若堵著像今晡日恁樣个好天時，打早斯會有三、四隻大鷓鴣，在四圍个山嶺頂飛啊飛。

撈阿權哥个嘴鼓都還言打煞，聽著遠遠个所在傳來「咻！咻！」个聲，鷓鴣出來了！阿權哥睺著鷓鴣出來，做等个山園事頭也無心做了，跔等一陣來搵接梨个工人，坐在佢工寮个蔭影²下欣賞這齣大自然个表演。

¹ 鷓鴣背：音 rhiau po zui / rhiau` po` zui` / iau` po` zui`；東勢東方山峰名，華語稱鷓鴣山。

² 蔭影：音 lim` rhiang` / lim` rhiang` / lim` iang`；陰影。

睺佢兜閉開長長个翼胛、搵等熱氣，慢慢迂、定定盤，越迂越高、緊盤緊遠，到尾變做天邊个一粒烏點，就像優雅个天頂王者，對天頂睺等佢兜守護个土地。

成下，會睺著佢兜胸挺挺、目盯盯停在脣頂个樹極頂高，好點點無聲無哨說斯種往下³，一瞞目轉身又飛往上，尖尖利利个腳爪，夾等一尾挨著神頭个蛇哥，斯一路「咻！咻！咻！」風神哎哎飛入密密个樹林裡肚。

又有成下，睺佢兜在高高个天頂盤等，忽然間，兩片翼胛一收，對天頂直直粹往下，佢心肝肚還想等：「這隻鷓鴣穩死無命了！」毋過，睺佢硬硬都會撞著地泥了，翼胛一閉、利爪一伸，黏時頓恬个一瞞目時間，佢該雙利爪，毋知哪時抓著一條臉身還在該扭啊扭个大老鼠，一轉身又飛到半天高了！

歸陣人睺鷓鴣表演睺到嘴擘擘，有人講：「難怪，在這搭園做恁久事頭，難得睺著蛇，斯係有這兜鷓鴣守護這搭所在，戴在四周圍个老嫩大細正有好安心生活啊！」

³ 種往下：音 zhung` gong` ha` / zung` gong` ha`；往下俯衝。

【甘蔗下个蟬仔】羅紫云原作

屋脣該埕¹竹甘蔗²，種幾下年了當大叢，斬忒又會過綻筍，等生到青里里仔，就變成蟲類園尋个好所在。

逐年大體到五月開始，日日到臨晝仔，就會有一群著等青衫，當靚當得人惜，頭大尾尖翼長，細細仔像手指尾恁大隻定定个草蟬，黏在長長青青个甘蔗葉下，盡力拈在該啦歌哩曲，佢兜總係唱等：「揸揸揸³——揸揸揸——」，完全無喊恠，一直愛到下晝兩點零正會煞棚⁴。

草蟬下班後，嫲牯蟬⁵隨跣等上棚，毋過，嫲牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡亮線，大聲唱等佢兜个愛戀歌：「蟬⁶——蟬蟬蟬！蟬——蟬蟬蟬！」佢兜都背等一臺自家製造个放送頭⁷，該聲亮到

盡遠都聽得著。佢心情好个時節，就安腦佢兜唱歌真好聽，心情毋好時，又試著佢兜吵耳塞窟，但係一想著佢兜來到這世上，斯有短短幾日仔，就當佩服佢兜恁煞猛打拚來完成唯一愛做个聲事⁸——傳宗接代，也做得原諒佢兜个嘶骸另命了。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，係有順序、有條理个，成時獨唱、成時合唱輪等來，像有人在該指揮樣，聲音一下亮、一下低、一下大、一下細，正經係千變萬化。其實，蟬仔有當多種，有兜一年、三年、幾年都戴在泥竇肚不見天日。佢兜困在烏泥肚，培養破土个熱情；在多年个等待之下，化泥力變做聲量，等鑽出重圍，就在這短短个幾日仔盡命拈。

佢心肝肚想：這埕甘蔗無落肥，敢係因為聽了蟬仔熱情嘹亮个歌聲，正緊生緊榮？該恁俚人乜愛好好來學習蟬仔，恁知恩圖報！

¹ 埕：音 pu / pu`；叢、穎的意思。

² 竹甘蔗：音 zhug` gam` zha` / zug` gam` za`；綠皮的甘蔗。

³ 揸揸揸：rham` rham` rham` i；草蟬的叫聲。借字。

⁴ 煞棚：音 sod` pang / sod` pang`；結束。

⁵ 嫲牯蟬：音 ma gu` sham / ma` gu` sam`；熊蟬。

⁶ 蟬：音 sham；熊蟬的叫聲。

⁷ 放送頭：音 fong` sung` teu / fong` sung` teu`；麥克風。

⁸ 聲事：音 shang` she` / sang` se；工作。

112 年全國語文競賽客家語朗讀文章國中學生組（饒平腔）

編號 5 號

【 盜蜂叮著記 】 李政暉 原作

分盜蜂仔叮著了！

該日晨早去山肚巡水做事，無睺著路脣个竹林肚有大蜂竇，嘛無細義撞著¹該枝竹篙，黏時，惡豺豺²个蜂仔就飛在佢个四周圍，對等佢臉身叨過來。佢睺係盜蜂仔，就著驚煞煞走，一頭退一頭陪臉身摺頭那毛面个蜂仔。退到無蜂仔个所在，正感覺頭那慙慙人怪怪，就遽遽行轉屋下歇睺一下。

無幾久，佢頭那殼、臉身、手髀摺脅下通棚開始疾，頭那殼感覺像雲浮在天嶼，還分人縊到腫腫又纏纏，害頭那昂昂³無法度思考。左手手巴掌腫到像大紅靛，手痺痺、手指尾會伸毋會勾；坐毋核、睡毋得，唉唉唧唧真艱苦，就像戴在陰間樣。

包尾分人送去病院掛急診，聽著佢分十過隻蜂仔叨，醫生認真對佢講，普通人分盜蜂仔叨著二十針以上就可能有生命危險，這種个蜂仔無解毒个血清，卡傷重⁴時會引起各種个症頭，最好愛

先通知你屋下人。醫生安排懸大笏射⁵摺抽血，交代佢先歇一下睺，若係有麼个無堵好愛黏時講。

等佢略略睡一睺後，感覺好當多就想愛轉屋下。毋過醫生愛佢加歇一下觀察睺啊，最好等尿水色正常，若係變烏暗泥色就較麻煩，愛送大間个病院。等加一下，無麼个问题，做得出院了，醫生還係吩咐講：「開个藥愛照三餐食吓，有麼个無鬆爽就愛煞兜倒轉來哦。」

轉屋下換衫褲正知全部叨著十六針，兩隻手髀紅腫，當癢。左手巴掌還係紅腫無感覺、頭那暈暈想愛睡。睡到半夜緊掘，癢到想愛摺皮掀開、掘到骨頭髓。食藥、膏藥無麼个效，堵好有人紹介講臺灣有一款牛樟菇做得強肝解毒，無定著對蜂毒有效，真神奇，食了該日暗晡就當好睡毋會癢。

這下蜂仔叨著个所在結疔了，睺著這兜疔，轉想著該兜蜂仔，當時淨自家一儕人在山肚有幾危險。

¹ 撞著：音 dung do` / dung` do^；接觸、碰到某物。

² 惡豺豺：音 og` sai sai / og` sai` sai`；很凶惡的樣子。

³ 昂昂：音 ngong ngong；頭昏神智不清。

⁴ 傷重：音 shong` diong` / song` diong^；很嚴重。

⁵ 懸大笏射：音 vien` tai` gong sha`；吊點滴，亦可說「吊大笏射」，音：diao^ tai gong` sa。

112 年全國語文競賽客家語朗讀文章國中學生組（饒平腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，摺最靚个回憶留下來，另外旅行也係一種學習，有一句話講：「行萬里路，贏過讀萬卷書。」在旅行个時節，一路項睺著个、聽著个，可能比在書頂學著个還較精彩、心色。

在印象裡肚，佢最懷念个一擺旅行，係前幾年佢八月半个時節，佢爺哀帶歸屋下人去花蓮遶寮。

佢兜來到花蓮富里个六十石山，一路感覺花蓮个空氣特別好，大鷓婆一聲又一聲歡喜自在个歌聲，響在彎彎幹幹个山路項，佢兜飛到高高个天頂，打開梟雄个翼胛，在山頭巡邏，佢兜係這片天地个大王，也係保護者。

等阿爸摺車仔停在忘憂亭，佢一下車就睺著滿山坪个金簪花開到當鬧、當打眼，想起識在電視裡肚睺過一隻紹介花蓮金針山个節目，講這位係一隻靚到會分人「起乩跳童」个所在，這句話正經半點都毋會差；在佢企在這高高涼亭个時節，睺著歸片个山頭，變成金黃色个世界，裡背間等泥香、野花香个山風對面吹過來該下，毋知仰般，佢心肝頭就有一種感動、還有幸福个感覺，

佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以，來到這邊寮个時節，愛曉得珍惜，毋單淨摺這美景用相片帶轉屋下，也愛摺自家个垃圾處理好，恁樣年年正有靚靚个風景好欣賞啊。

臨暗个日頭像一粒漬紅个柑仔，懸在天邊个時節，本旦開到盡有精神个金簪花，像約定好共下下班个樣仔，全眨等目珠互相偎憑，恬恬仔睡忒了；難怪金簪花又安到「一日美人」，佢跔等朝陽跔起來，又在日頭落山時節，合起佢該錫人个花蕊衫裙，做一個靚一日个美人。

時間過忒已久了，有成時佢還係會想起該擺「金黃色个旅行」，親像又聽著大鷓婆歡喜个歌聲，盡久……盡久。

112 年全國語文競賽客家語朗讀文章國中學生組（饒平腔）

編號 7 號

【最風神个社團活動】劉純汝原作

兩年前正開學个時節，提著社團選擇單，哇！一拖拉牯¹呢，有服務隊、排球隊，還有童軍團、熱舞社……，該量時，毋知選哪隻正好？欸！「西洋劍隊」，佢目珠一金，仰恁沙鼻、恁風神个名仔喎？「噠，就選你了！」

這下想起入團隊个第四隻月，佢總算有機會參加全國比賽。換佢上場哩，劍衫拉好勢，面落仔膠手落仔乜戴好勢，夾起電衫，跔正馬步，盡力拚囉！比賽一開始，佢提等劍煞力牯滑步搶前進攻，使出蠻力拂啊拂欸。旨知，佢長刺佢撥擋、佢飛刺佢敲劍……，阿姆哀！總係分佢閃淨淨，戰術乜分佢暍透透！佢个心肝發勾筋²，手腳亂忒了，節奏乜亂忒了；對手密密咻！咻！咻！咻，佢嘎緊拓緊失分，輸到恹恹恹恹！

佢一比煞，軟怠怠个雙腳黏時就跪落地，胚命个「啊」一聲，就像氣凹凹仔个相打雞，落喪落喪³！原旦个自信怕係走到天頂膠白雲爽園人尋去了！

感心个劍隊伴仔，全都行兼佢——有人送涼水、有人撚背囊、還有人膠佢捕纏纏，教練乜溫柔个安慰佢講：「人生有時星光、有時月光，你打到當湛了，下二擺再過加油！」目汁強強會忍毋核个佢，深深感受著大家親像寒天个細日頭，佢心肝肚黏時就燒暖燒暖！

人講「臺頂三分鐘，臺下十年功」正經有影。聽起來恁風神个「西洋劍」，做起來無恁該！除忒考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著仰般面對失敗、仰般面對毋湛斗个自家，面對問題、解決問題！佢當煞猛打拚，發揮客家人个硬頸精神，練好基本功，抓捉要領；十年磨一劍！佢个劍術緊來緊進步了，武藝比得古代个花木蘭哩！

「西洋劍」係源自十七世紀个歐洲，乜係奧運項目之一；有分鈍劍、銳劍、軍刀三種，競賽員在比賽个時節，企在金屬枋仔頂高个兩片析準備，愛用劍頭先刺著對手有效个部位就算得分，嶄蠻有速度感膠爆發力。

「西洋劍」毋單淨培養專注力、思考力，還愛有觀察力膠判斷力，實在係「最風神」个社團活動喎！

¹ 拖拉牯：音 to' la gu'；語源於日語「トラック」，卡車，此文形容很多之意。

² 發勾筋：音 bod' giu gin' / bog' giu' gin'；指心裡很著急。

³ 落喪落喪：音 log song' log song'；表垂頭喪氣之意。

112 年全國語文競賽客家語朗讀文章國中學生組（饒平腔）

編號 8 號

【 崁下該頭杳仔樹 】徐秀英原作

戴在鄉下，屋脊種幾頭樣仔樹、牛眼、硬杳仔係當平常个，一到打子个季節，管佢有熟也無熟，係食得个東西。細人仔絕對無放佢煞，就驚吵著睡當晝个叔公、叔婆，係分佢兜大聲逐，該下晝就無戲好唱了。

佢屋下就在伙房个最尾析，崎仔溜啊下就係礮崁，崁下个圳溝係細人仔熱天个天堂，洗浴仔、庠魚仔、捉蝦公、懸蛤蟆膠蛎仔，想得著个空頭，麼个就搥得著來爽！該頭硬杳仔樹就對崁下个石壁面哼出來。

阿嬤當好食這頭个黃杳仔，見睺著杳仔會食得該駁仔，佢就會怙等拐棍仔行兼來摺佢這兜細孬仔講，青杳仔食了會屙硬屎，愛等佢黃正好食。細人仔个嘴應講好，一群豺狗哪！哪佇得著佢兜該張嘴，幾雙賤手摘得著个，全部就摘來楔牙縫了，除了生到忒樹尾摘毋著个，阿爸就會提竹篙剪去剪下來，較硬个佢會自家食忒，較熟个佢會放到米缸裡背翕加兩日正提去分阿嬤食，無牙齒个阿嬤，糜啊糜仔，歸面滿足个笑容，到這下佢都還記得。

該頭硬杳仔樹頂，輒常會有青鸚仔飛來作竇。青鸚仔毋驚

人，佢兜在樹下爽份家啦，佢在樹頂高啾啾滾飛來飛去。細人仔雖然番綻，毋過從來毋識去撞過佢个竇。較盤擎个會跋上石壁去算睺啊，竇肚有生幾多粒卵。一駁仔後，樹頂又加加幾隻得人惜个細鳥仔，生命就恁樣生養下去。

樹頂高也有膨尾鼠跳上跌落，還有共樣毋驚人个山狗太、狗嫲蛇趁上趁下。膨尾鼠个尾絨絨，當得人惜，屋下食伸个果子也係果仁、果皮放到樹底下，佢兜會輪等跳過來食，咕嚕嚕个目珠仁迂迂轉¹，就驚人來搶食个樣仔，實在還心色。山狗太、狗嫲蛇就無恁得人惜了，因為佢个皮膚有保護色，分樹梗抑係燥葉仔壅到共下个時節，一無注意就會分佢兜嚇著，所以佢盡惱山狗太。

恁多年過去了，崁下該頭硬杳樹早就無在了，毋過，該童年个回憶，不管哪久就恁香甜个放在佢个心肝肚。

¹ 迂迂轉：音 din˘ din˘ zhan˘ / din˘ din˘ zen˘ / din˘ din˘ zan˘；轉來轉去。